


KE MANG YO?

 Šegofatšwa, ngwanešu. Ke mo go botse go hwetša go tla ntlong ya Morena.

² Ke nagana gore ke be ke ithuta Lengwalo le lengwe, nako ya go feta, gomme Le boletše gore ge Jesu a be a batamela Jerusalema, gore barutiwa ba ile ba phagamiša mahlo a bona godimo gomme ba bona toropokgolo kgethwa kgole, gomme ba thoma go hlalala le go bolela, gore, “A mmušo o tla bušetšwa bjale?”

³ Gomme monna yo a itšego yo yoo a bego a bolela, goba a bolela ka ketelo ya kgauswana ya Palestina, gomme o boletše gore batho bjale, ka ngwageng wa go feta, ba be ba etla lefelong lela, ge ba etla godimo go tšwa moeding le go lebelela sekhutlo, tsela ya go swana ye Jesu le barutiwa ba bego ba le go yona ka nako yeo, gore ge ba bona toropokgolo, ba ile ba thoma go lla.

⁴ Le a tseba, ke a dumela, go be go le se sengwe barutiwa bale, ka matšatšing ao, ba ikwetšego, gore—gore mmušo o nyakile o loketše go bušetšwe gape.

⁵ Gomme bjale e nyakile go ba nako. Gomme ke a dumela ao ke maikwelo ao a lego go batho, gore mmušo o nyakile o loketše go bušetšwa gape.

⁶ Ngwanešu Neville, ngwana wa bo rena yo bohlokwa le modiša wa go šegofala, o sa tšwa go bolela le nna ka matsapa a tsošeletšo ye e tlogo mo ka tabarenekeleng, ka go matšatši a se makae, go rapela ka yona. Gomme ke mmoditše, ke gopotše gore e tla ba selo sa go šegofala.

⁷ O no se kgone go ba le ditsošeletšo tše ntši kudu. Gomme dinako tše ntši re hwetša kgopolo ya go fošagala ya tsošeletšo. Tsošeletšo ga se kudu go tliša ka gare maloko a maswa, eupša ke go tsošeletša se re šetšego re na le sona. Gomme nna . . .

⁸ Ke rata go bolela se, ka gore ke se bolela go tšwa mabotebong a pelo ya ka. Go re ke thoma go hwetša maikutlo a go fapana tikologong ya tabarenekele go feta ka fao go bego go le nako ye telele, maikutlo a—a go teba a semoya, go swana le ao a bego a tlwaetše go ba, nako ye telele ya go feta; gore se sengwe se se iketlago, gomme se na le motheo wa kgonthe. Gomme ke a tshepa gore Modimo o tla šegofatša kereke ye nnyane ye, gomme . . .? . . . gape ka go maatl a yona.

⁹ Gomme ke bona lenaneo la go aga le tšwelapele, gomme ke a nagana ke selo se segolo. Gobane, ka pelapela goba moragorago, rena batho ba batšofadi kudu re ya go hlobola tlhamo le go e neela morago ka diatleng tša bana ba rena, le go sepela go hlatloga Tselaleterapo ya gauta.

¹⁰ Letšatši le lengwe ke fetile maraka wa tsela gare bjale, wa masometlhano a mengwaga bogolo. Ke no se kgone go lemoga seo. Ga go bonale o ka re go be go se nako ge e sa le mola ke be ke gogela Chris Meisner dijo, e ka ba lesomeseswai, lesometshele, bogolo bja lesomeseswai. Eupša go nno ya felotsoko. Go no ya go laetša gore mo ga re na le toropokgolo ye e tšwelagopele, eupša re nyaka e Tee e tlogo. Gomme yeo ke Toropokgolo moo Modimo e lego moagi, gomme go ka se tsoge gwa ba mafelelo fao.

¹¹ Mosong wo, ge ke be ke bolela ka letšatši la mme, le go leka go bea mme e sego bjalo ka ge kgonthe a le, ka botšofading, ka mašošo, le godimo ga rena; mahlotlo a gagwe, goba setulo sa kgale sa go thwetha, goba setulo sa matsogo, le pitsana ye nnyane ya matsoba e dutše kgauswi le yena; eupša mme ka tsogong, a bušeditšwe morago go boswa bja gagwe, gomme a eme, a kganya bjalo ka kgošigadi. Yeo ke tsela ye ke nyakago go nagana ka mme wa ka. Ga ke nyake go nagana ka yena ka fao a lego lehono, motšofadi. Ke nyaka go nagana ka se se tlogo. Gomme ke a tseba le ikwela ka tsela yeo ka bommago lena. Nagana ka yena bjalo ka ge kgonthe a le ka pelong ya gagwe. Le ge bontši. . . bjalo ka ge moreti a re, “Bophelo bo be bo se bonolo go yena, eupša o tla bo phela bjohle godimo gape, go no dira se sengwe go wena.” Kafao Modimo o ya go bo dira tsela gore a kgone go phela go ya go ile le wena. Kafao ke thabetše seo.

¹² Ga ke tsebe gore gobaneng, ke dirile tsebišo ye, mosong wo, gore ke be ke tla bolela bošegong bjo, ge Morena a rata, ka: *Ke Mang Yo?* Ka nnete ga ke tsebe ke ya go e dira bjang. Eupša ke be ke le matasatasa godimo go fihla e ka ba iri le metsotso ye lesome ya go feta, ka dipoledišanonyakišišo morago ga sekgalela sohle, gomme ke bile le tša go ikgetha le—le dipitšo tša tšhoganetšo. Ga se ka di kgona.

¹³ Gomme ke le nyaka le tšwelapele go rapelela Ngaka Sam. O—O tla mmogo gabotse, gomme re a le bogo. Gomme Ngaka Baldwin le Mdi. Baldwin bobedi ba welwa ke maruru. Ba tla mmogo gabotse.

¹⁴ Ke le nyaka le bee yo moswa godimo ga lenaneo la lena la thapelo, morago ga sekgalela se. Yoo ke Harry Lease tlase mo, radiokobatši. Harry ke mogwera wa ka wa sebele. Gomme ge feela ke be ke mo tseba, ke be ke gopola gore o be a le Mokriste, go fihla morago ga sekgalela se, ge ngwanabo a dirile kgopelo ya phološo ya soulo ya gagwe. Ngwanešu Mike Egan o tlišitše. . . mohlokomelaphahlo wa rena mo, o tlišitše ditaba. Gomme Harry o ka go seemo sa go hlobaetša, ntle ka sepetlele. Ke be ke sa tsebe o be a gopola kudu ka nna; eupša, o ganne modiša wa gagwe mong, morago ga sekgalela se, goba modiša wa kereke mo a yago, gomme o nyakile nna go tla go mmona. Gomme ke nyaka go ya go mmona. Kafao, rapelelang Harry.

15 Re thabile mo, bošegong bjo, go lemoga, ke bagwera ba ka mo, go tšwa tlase ka Georgia, Ngwanešu Welch Evans le lapa la gagwe. Ke bona, gape, baeng ba bangwe bao ke bego ke sa ba tsebe, go molaleng ba be ba le mo mosong wo.

16 Ge ke sa phoše, ke bona Ngwanešu le Kgaetšedi Elmer Collins morago kua, go tšwa Phoenix, Arizona. Oo, ga se wa fetoga. Go lebega o ka re o swanetše go apara diaparo tša ralawene, gomme—gomme o etla ka gare go tšwa seporong. Gomme o amogetšwe gae! Nka se kgone go go kgopela go dula mo, gobane o hweditše lefelo e le le lekaone, o a bona, leo ke le lekaone, Phoenix. Ke nyaka go dula kua, letšatši le lengwe, nnamong.

17 Gomme ka gona ke bona Ngwanešu Smith mo, wa kereke ya Modimo, ntle kua. Ngwanešu Smith, e filwe nna, puku ya gago ye nnyane, letšatši le lengwe, goba maabane morago ga sekgalela, thari. Ga se ka be ka e bala bjale, eupša ka nnete ke tla e hlatsela, ge feela ke tseba o e ngwadile. E swanetše go ba kgontho, therešo Lengwalo. Modimo a go šegofatše. Gomme ke a holofela ke katlego.

18 Le ba bangwe ba bantši, nka kgona go bolela. Lena bohle le amogetšwe mo tabarenekeleng. Gomme ke ipshinne ka pina yela, mosong wo, ya Kgaetšedi Stricker yo a opetšego, “O lebeletše ka lethise, go yena.” Banešu ba ka ba Mennonite mo, ke thabile go ba le bona ka gare. Gomme, oo, lena bohle! Mogwera mo, ke a dumela, go tšwa godimo Illinois, morwagwe o tšea dikgatišo ka morago, go ba le go kopana le bona gape. Gomme bontši kudu, nka no. . . Ga ke nagane gore ke a go šikologa ge ke sa bitše leina la gago, eupša ke no le amogela bohle.

19 Bjale a re baleng bošegong bjo, bakeng sa thuto ya Lengwalo, go tšwa go Mateo tema ya 21, go thoma go temana ya 1, le go bala go theoga, le 11, go akaretša.

Gomme ge ba batametše kgauswi ke Jerusalema, fao ba tla, gomme ba tla Bethefage, thabeng ya Mehlware, nako yeo Jesu a roma ba babedi ba barutiwa,

A re go bona, Yang ka motseng wo le lebanego le wona, gomme ka pela le tla hwetša pokolo e kgokilwe, gomme e na le pokolwana: di tlemolleng, gomme le di tliše go nna.

Gomme ge motho a ka bolela le lena e ka ba eng, le tla re, Morena o a di hloka; gomme tsela thwi o tla di romela.

Tšohle tše di dirilwe, gore go phethegatšwe se se boletšwego ke moprofeta, go re,

Botšang . . . barwedi ba Sione, Bonang, Kgoši ya lena e tla ka bonolo . . . e dutše godimo ga pokolo, le pokolwana namane ya pokolo.

Gomme barutiwa ba ile, le go dira bjalo ka ge Jesu a ba laetše,

Gomme ba tliša pokolo, le pokolwana, gomme ba bea godimo ga tšona diaparo tša bona, gomme ba mmea godimo ga tšona.

Gomme lešaba le legolo kudu la ala diaparo tša bona ka tseleng; le go ripa fase makala go tšwa mehlareng, gomme ba a ala ka tseleng.

Gomme lešaba le le etilego pele, le le bego le latela, le goelela, le re, Hosiana go morwa wa Dafida: Mošegofatšwa ke yo a tlogo ka leina la Morena; Hosiana magodimongdimong.

Gomme ge a etla ka Jerusalema, toropokgolo yohle e ile ya šišinyega, ba re, Ke mang yo?

Gomme lešaba la re, Yo ke Jesu moprofeta wa Natsaretha . . .

A re inamišeng dihlogo tša rena bakeng sa thapelo.

²⁰ Oo Morena, re a makala go no re ke eng re bego re ka e bolela, ge re ka be re phetše ka matšatšing ale. Eupša re phela ka go letšatši le legologolo, ge re lebeletše Yena go tla. Gomme ge re dira ditokišetšo, Morena, re dira dipelo tša rena go lokela, le go tliša dišerefe tšohle ka gare tše re ka kgonago go di kgoboketša go tšwa mašemong a puno, mmogo mo gae le mošola. Re a nagana le—le go lakalela go nako ye re tla Mmonago a etla, a nametše pere ye tšhweu, a theogela fase go tšwa dikgorong tša Letago, go fetola le go beakanya mebele ye ya go bola ya rena, go ya go mmele wa letago wa go swana le wa Gagwe mong, mo go ka se bego le sebe goba leswao la lehu le ka tsogego la tsena. Gomme re tla Mmona ka mo A lego, gomme re phela, gomme ra Mo rata go kgabola ntle mabaka ao a sa tlogo.

²¹ Re leboga Wena bakeng sa kereke ye le modiša wa yona, le bakeng sa bahlokomelaphahlo le matikone, le bakeng sa motho yo mongwe le yo mongwe yo a tlogo mo; le bakeng sa baeng ba ba lego ka dikgorong tša rena, tšeo ke dinku tša lešaka la go swana, eupša go tšwa šakeng le lengwe. Re tla kgopela gore O tla ba šegofatša, bošegong bjo, ka Bogona bja Gago.

²² Gomme re fepe ka Lentšu la Gago, gore re kgone go tloga mo, bošegong bjo, ka maikemišetšo go ba Bakriste ba bakaonekaone go feta mo re kilego ra ba. A nke re tloge ka kholofelo ye mpsha ka pelong ya rena, le ka lethabo, re letetše go Tla ga Gagwe.

²³ Ge ka phošo go na le ba bangwe magareng ga rena, ba ba babjago le go tlaišega, re ka se lebale go ba rapelela. Gore ba . . . Go tleng ka moagong, bošegong bjo, mo re kgobokanago go rapela, ba tlile ka gare, ba babja, a nke ba ye ka ntle ba le gabotse.

24 Gomme re tla kgopelela bao ba palelwago, ka magaeng le ka dipetlele, gomme ba le godimo ga mepete ya ditlaišego. Re a rapela, O Modimo, gore mogau wa Gago o tla fihla fase go bona.

25 Re tla rapelela bao ba bothata, bošegong bjo, ba ba sego ba be ba latswa le go bona gore Morena o lokile, ba ba sa tsebego gore go ra eng go ratwa ke Modimo. Ba no se kwešiše se ba se lobago. O Modimo, a nke kgašo ya seyalemoya, goba tsela ye nngwe, e kgwathe dipelo tša bona, gomme maikutlo a bona a ke a retolletwe go Wena pele lemati la kgaogelo le tswalelwa gomme ba tswallelwa ka ntle, go emela dikahlolo ntle le kgaogelo.

26 Re thuše, Morena. Dilo tše re rapela Leineng la Morena Jesu, le bakeng sa letago la Gagwe re a se kgopela. Amene.

27 Batho ba be ba pitlagane go dikologa dikgoro, gomme mekgotha e be e pitlagane, gomme go be go se le ge e ka ba kamora go batho go robala. Ba be ba robotše ka ntle ga leboto, mogohle mabaleng, ka gore ye e be e le paseka. Gomme batho ba tšwa gohle go lefase la go tsebja, go rapela ka nako ye. E be e le nako ge kwana ya paseka e bolailwe. Gomme e . . . E be e emela go lokollwa ga bona go tšwa Egepete, ditleng. Gomme ba be ba boloka ye, ngwaga ka ngwaga. Ngwaga wo mongwe le wo mongwe, paseka ye kgolo ye e be e direga. Gomme e be e le ye nngwe ya dinako tša go ikgetha kudukudu tša . . . goba ditiragolo tša bodumedi bja Bajuda, gobane e be e era nako ye ba bego ba lokollwa.

28 Batho bohle ba rata go nagana ka yeo, nako ye ba bego ba lokollwa. Kafao yo mongwe le yo mongwe wa rena, bošegong bjo, a ka kgona go ya morago go nako ya ge re be re lokollwa! Se e bego e se rago go rena!

29 Ke kgona go elelwa ka go boitemogelo bja ka mong, ka fao pelo ya ka ya go šokiša ya bošemane e bego e lakatša go kgwatha Modimo. Ke ile ka gopola, “Oo, ge ke be nka kgona feela go ya godimo le go kokota go mojako wa Gagwe, le go bolela le Yena lebakana le lennyane!” Gomme, nnete, le tseba kanegelo ya ka. Ke ikhweleditše pampiri le phentshele, gomme ke be ke eya go Mo ngwalela lengwalo, gobane ke be ke sa kgone go bolela le Yena. Gomme ke tsebile gore O be a phela ka dithokgweng, gobane ke be ke Mo kwele, gomme ke be ke Mmone a sepela ka dithokgweng. Gomme ye—ye e itšego, tsela ya kgale ya go tlwaelega ye ke bego ke tlwaetše go theoga ge ke be ke eya go tsoma goba go thea dihlapi. Ka gopola, “Ke tla no le kgorametša mohlareng, le go le ngwalela go Mna. Jesu.” Feela ka tsela ye nngwe gore morwalo wola o kgone go tloga pelong ya ka.

30 Oo, bošego bjoo, tlase kua! Nka no lebala mengwaga ya ka, ebile nka no lebala leina la ka nako ye nngwe, eupša nka se tsoge ka lebala iri yela ge A ntokolotše go tšwa sebeng. Se sengwe se diregile, tlase ka gare ga ka, seo se nthušetšego go kgabola diiri tše kgolo tša leswiswi. Iri ya tokologo ya ka, maima a sebe a ile a

ntlogela, gomme ke be ke le motho yo moswa. Ke bile sebopiwa se seswa ka go Kriste Jesu, ge e sa le.

³¹ Gomme Bajuda ba, ba be ba etla godimo, ngwaga ka ngwaga. Gomme go be go le mo—mo mothopo ka gare ga kereke. Gomme ba be ba tšea bo—bo borotho, le digwere tša go galaka, le kwana, gomme ba be ba enwa go tšwa go mothopo wo ka kerekeng. Gomme ba be ba hlalala mmogo gobane Modimo o be a ba laeditše go ratwa. Kafao, ye ka ge e le nako ya paseka, gomme e sego feela gore e be e le nako ya paseka, eupša e be e le paseka ya go ikgetha.

³² Le a tseba, go ba le dinako tše dingwe re yago kerekeng gomme. . . Ka mehla re rata go ya, eupša dinako tše dingwe go na le se sengwe sa go ikgetha se diregago.

³³ Gomme ye e be e le ye nngwe ya dinako tšeo. Moya o be o tladitšwe ka tetelo, feela bjalo ka ge go le lehono. Mahlo a bohle ba bego ba Mo rata a be a Mo hlokometše go tla ka kgoro.

³⁴ Gomme ke a dumela ke kwano ye kgolo ka tsela yeo lehono, go bao ba Mo ratago ba Mo lebeletše. Moya o tladitšwe ka tetelo.

³⁵ Ge, rena re phela ka go letšatši le, ge lefase gabotse le, le tlile ya ba molongwana wo wo mogolo wa lerole. Gomme saentshe e a re botša, “Ke metsotso ye meraro go fihla bošegogare.” Gomme ke na le nnete le be le le bala, bjalo ka nna, letšatši le lengwe, kanegelo ya mogenerala yo ka sešoleng, o boletše, go re, “Ge go be go le ntwangwe, e be e ka tšea feela metsotso ye mebedi goba ye meraro.” Matšatši a kgale a go lwa, le diraborolo tša go thuntšha, le epa melete ya diphukubje, seo sohle se fedile. Ba a tleleima ntwangwe e latelago e tla ba feela metsotso ye mebedi goba ye meraro. Letšatši le lengwe, motho wa sehlakana hlogo o ya go thuntšha sekhurumelo sa gagwe go tloga le go thuntšha e tee ya dipomo tšela. Gomme ge ba dira, re na le dikota tša go theetša, mogohle, go e thunyetša thwi morago gape. Lefase le ka se kgone go phonyokga yeo.

³⁶ Yo mongwe le yo mongwe ka go paseka o tsebile se sengwe se be se eya go direga, eupša ba be ba sa tsebe feela se e bego e le sona.

³⁷ Gomme ke tsela ye go lego lehono. Gagologolo yo mongwe le yo mongwe o a tseba gore se sengwe se lokela go direga. Yo mongwe le yo mongwe o tseba seo. O ka bolela le modiradibe, o ka bolela le rakgwebo, o ka bolela le yo mongwe le yo mongwe, gomme, oo, ke nako ya go se khutše go lefase.

³⁸ Eupša o ka kgona go bolela le monna goba mosadi yo a lebeletšego Yena a etla, gomme letago le godimo ga sefahlego sa bona, le phadimela ntle. Ba šeditše tiragalo ye kgolo. Kafao moya wohle o tladitšwe gape, ba letile se sengwe go direga. Lefase ga le tsebe se se lokelago go direga, eupša Kereke ya Modimo yo a phelago e tseba se se yago go direga. Ba a tseba gore ka pejana phalafala e tla lla, gomme re tla Mmona a etla, a katiša go tšwa

Letagong, godimo ga pere ye tšhweu, le madira a Legodimo a Mo latela. Gomme bao ba hwetšego ka go Kriste ba tla hlatlošwa le go tšeelwa godimo go kopana le Yena ka moyeng. Seo ke se re se lebeletšego. Re se hlologetše.

³⁹ Gomme re a botšwa gore disoulo tša bomme bale, le go ya pele, re boletšego ka tšona mosong wo, feela ka tlase ga aletara ya Modimo, di a goeletša, “Botelele bjo bokae, Morena? Botelele bjo bokae?” Mme o nyaka go go bona kudu ka mo o nyakago go mmona. Gomme baratwa ba rena ba nyaka go kopana le rena gabotse ka mo re nyakago go kopana le bona.

⁴⁰ A kopano gape e tla bago yona, ge A etla! Go kopana le baratwa ba rena le go ba bona ka go mmele wa bona wa tsogo, gomme ba tagafetše, le go sepela tikologong le bajabohwa ba tsogo, ba šeditše semelo sa bona, ka fao se fetotšwego, boleta le go homola. Gomme e ka se be lepotlapotla, le go taboga le go thuhlulana, gobane re tla ba le Bokagosafelego gohle go phela mmogo.

⁴¹ Oo, nako ye ya lefofonyane re e phelago, feela e sego nako ya lefeela, go no namela, le go thuhlula, le go tlimarela, gobaneng, ke letšatši la go šiiša.

⁴² Gona, ge ba letetše se sengwe go direga, go be go befile kudu gore bontši bja bao ka pasekeng ga se ba ke ba fihlele go Mmona. Go le bjalo, ba tsebile se sengwe se be se eya go direga, eupša go le bjalo ga se ba ke ba fihlela go Mmona.

⁴³ Kafao go tla ba bjalo ka go Tleng ga Morena. Go ne batho ba bantši ba go se dudišege, lehono, ba ba tsebago gore se sengwe se lokela go direga, eupša ba—ba ka se tsoge ba Mmona. Ka gore O tla tla ka go homoleng ga bošegogare, go ubula go tloša Kereke ye nnyane yela e hlologetšego le go leta le go letela go Mmona. Bao ke ba A tla tlogo go ba ubula go tloga. Bontši bja lefase le le phelago ka go matsaka, le go ketekiša disoulo tša bona godimo ga dilo tša lefase, ba ka se tsoge ba tseba se se diregilego, go fihla Kereke e ile ka Letagong, gobane O tla tla bjalo ka lehodu bošego le go ba ubula go tloga. Kafao re kgona go bona re morago gape go lefelo la go swana. Bjale re hwetša ntle, gore, ditetelo tše, gore Modimo o tla go bao ba . . . Gohle go kgabola Mangwalo, e bile selo sa go swana. Gore ba . . . Ka mehla O tšwelela go bao ba Mo letetšego, ka mehla go bao ba nyakago go Mmona. Gomme ke na le nnete gore yeo ke kholofelo ye e lego go dipelo tša rena bošegong bjo.

⁴⁴ Ebile e ka ba dikgwedi tše tshela tša go feta, ke a akanya, ke be ke paka go batho ba bangwe. Gomme ke rile, “Oo, go nagana ka yona, seo e no ba bontši kudu nako ye nngwe le ye nngwe O tla tla!”

⁴⁵ Gomme ke eng e ntirilego go bolela seo, ke be ke bolela ka Ngwanešu Bosworth. Ge ke ile go bona mokgethwa yola wa go tšofala, ge re kwele go re o be a ehwa, masomeseswai le metšo ya

mengwaga bogolo, mosadi le nna ra ya tlase go . . . kua go mmona pele a ehwa. Ke ile ka no swanela go bolela se sengwe go yena. Ke rata go šetša bakgethwa ge ba tsena Letagong, gomme ke ile ka swanelwa ke go mmona. Gomme re ile ra tšhuma dithaere go tloga go koloi.

⁴⁶ Eupša ge ke fihla kua, le go kitimela ka lemating, ka sekhutlwaneng se senyane go be go robetše mopatriaka yola wa go tšofala. O ile a phagamišetša hlogo ya gagwe godimo ge a mpone ke etla. A gagwe a go tšofala, matsogo a go fokola a be a lekeletše ntle, ka nama ya go lekelela fase. Gomme a fihliša matsogo a gagwe go nna. Ke ile ka mo swara go dikologa molala gomme ka goeletša, “Tate wa ka, tate wa ka, dikoloi tša Israele, le banamedi ba dipere ba tšona,” gobane o be a kgethwafaditšwe, monna wa bomodimo.

⁴⁷ Gomme ka re, “Ngwanešu Bosworth, ke nyaka go go botšiša se sengwe. A o a dumela gore o tla fola?”

O rile, “Oo, nna ebile ga ke babje.”

Ka re, “Gabotse, molato ke eng?”

⁴⁸ O rile, “Ke ya Gae.” O rile, “Ke lapile, gomme ke onetše. Gomme ke no nyaka go ya Gae.”

⁴⁹ Ke rile, “Gona a o a lemoga gore o a hwa?” Ke rile, “Ke nyaka go go botšiša se sengwe. Morago go theoga go kgabola mengwaga ye masomešupa le metšo ya bodiredi, motsotso wa gago wa letagotago ke ofe? A o ka kgona go bolela le nna, mohlomphegi, le go mpotša boitemogelo bjo o bilego nabjo, tlase go bapa le mothalo, bjo o ka bo balago go ba iri ye kgolokgolo ya gago.”

⁵⁰ Ke tla phela go bona mengwaga ya gagwe, nka se tsoge ka lebala, ge mahlo a maso ale a ntshwere, godimo ga bogodimo bja digalase tšela. O rile, “Ngwanešu morategi wa ka, ye ke nakwana ye kgolokgolo kudu ya bophelo bja ka. Ga ke kgone go nagana ka nako ye nngwe gape ye e bile letago kudu go feta thwi bjale.”

⁵¹ Ke ile ka mo lebelela ka sefahlegong, gomme ka re, “Mohlomphegi, a o sa tseba gore o a hwa?”

⁵² O rile, “Ngwanešu Branham, ke robetše mo, ke letetše motsotso wo mongwe le wo mongwe go Yena go bula lemati lela le go tla, go ntšeela Gae le Yena.” Yeo ke tsela ya go hwa. Yeo ke tsela ya go ya.

⁵³ Gomme bjalo ka ge le tseba, gore, e ka ba diiri tše pedi pele a ehwa . . . O be a le, o be a robetše ka kidibalong, lebaka la ka godimo ga matšatši a mabedi. Gomme ge a tlile go boyenamong, o ile a phagamela godimo ka kamoreng, gomme a thoma go bolela le mosadi wa gagwe. Nako yeo, gohle ka bonako, a bonala o ka re o bonala bokagare. Gomme a šišinya diatla, lebaka la iri ya go tlala goba go feta, le bagwera, ba ba bego ba hwile lebaka la mengwaga ye masomenne goba masometlhano, ba e bego e

le basokologi ba gagwe ka go kereke ya gagwe. A šišinya diatla le mmagwe le papagwe. Go fihla a be a . . . bophelo bo tlogetše mmele wa gagwe, a robala fase godimo ga mosamelo gomme a ya go robala, ka matsogong a Morena Jesu. Ga go selo sa go swana le go Mo direla, go Mo letela.

54 Gomme ge ke be ke bolela le monna yo ka se, le go bolela boitemogelo bjola, ke boletše se. Ke rile, “Mohlomphegi, oo, a e ka se be letago ge re Mmona? Oo, ge A ka tla lehono!”

O rile, “Ngwanešu Branham, o se tšhoše batho ka mokgwa woo.”

Ke rile, “O ra go reng?”

55 O rile, “Oo, o se ke wa botša batho gore lefase le a tla, goba Kriste o a tla. E a ba tshwenya.”

56 “Oo,” ke rile, “aowa. Ke kgopela tshwarelo ya gago. Go bao ba Mo lebeletšego, ke ditaba tša letago kudukudu tše ba ka kgonago go di kwa, gore Jesu o kgauswi le go thuba go kgabola le go tšea Kereke ya Gagwe.” Botšofadi bo tla fetolwa go ba boswa. Lethabo le tla fiwa bakeng sa leswiswi. Bophelo bo tla fiwa bakeng sa lehu. Go se hwe bakeng sa go hwa, go tla fetolwa. Oo, a nakwana, go tseba gore O tla tla!

57 Ba be ba Mo lebeletše. Ba be ba Mo letetše. Gomme ge A tlile, re hweditše gore go be go le maphakga a mabedi. Sehlopha se sengwe se be se le kwanong le Yena, gomme se sengwe se be se le kgahlanong le Yena.

58 Gomme ke tsela ye re e hwetšago lehono. Seo ke se, go tla ga Gagwe, ka mehla go arogantše batho. Nako le nako, ge o hwetša Jesu, o hwetša bao tikologong ba bego ba le kgahlanong le Yona. Yoo ke Sathane. Gomme, lehono, ge re nagana ka yona, ga re bone phetogo ye ntši. Go no swana. Batho ba fetogile, eupša moya wa batho ga se wa fetoga.

59 Kafao ge mafelelong ba lebeletše ntle ga kgoro gomme ba Mmona a etla, a nametše godimo ga ye nnyane yela, pokolo ye tšhweu, ga go makatše barutiwa ba ile ba thoma go—go goelesa, “Mmušo wa Magodimo o tlile!” Batho ba ile ba kitima go Mo gahlanetša, gomme Jerusalema yohle e ile ya huduega. Go na le se sengwe ka yona, ge Jesu a etla, ka mehla go a huduega. Gomme toropokgolo ka moka ya huduega. Gomme ga—ga ba kgone go e fihla.

60 Gomme bareri ba letšatši leo ba ile ba swanela go fa lebaka la khuduego ye, ka gore e be e le ka monyanya wa paseka. Gomme ba goelesa ntle, “Ke Mang Yo?” ge moya o be o tletše. Gomme go tla ga Morena Jesu, go ya Jerusalema, go ile gwa swanela go tlatša moya ka ditetelo. Go lebega o ka re barutiši ba swanetše go tseba se se bego se eya go direga. Go be go lebega mo o ka rebo moprista yo mogolo o swanetše go be a e tsebile. Go be go lebega mo o ka rebo baprista ba bangwe bohle ba ka be ba e tsebile.

61 Gomme ga se a fetola e ka ba eng, lehono, gobane Moya wo Mokgethwa o etellapele go Tla ga Morena Jesu. Gomme ge Moya wo Mokgethwa o thoma go ngangologa ntle go kgabaganya lefase, mello ya tsošetšo e phatlogela ntle, mogohle, maswao a magolo le dimaka di dirilwe, phodišo e diregile, diprofeto di ile pele. Go kgobokana gohle ga ditšhegofatšo tša boapostola di tlile morago go Kereke gape. Kafao, bjalo ka ge go bile bjalo nako yeo, kafao go bjalo bjale, moya wa mosedumele o sa lla ntle, “Ke Mang Yo?”

62 Ba bangwe ba bona ba dumetše go Morena Jesu, gore O be a le monna wa go loka. Ba bangwe ba bona ba rile, “Yena ke Monna wa go loka.”

63 Ke se ba se bolelago lehono. Ba leka go Mmea bjalo ka Napoleon, mohlabani. Ba leka go Mmea bjalo ka—ka George Washington, monna wa therešo. Eupša O be a feta fao.

64 A le etše hloko palo ya Lengwalo? Ba rile, “Yo ke moprofeta yo a tšwago Galelia.”

65 Gomme ba leka go bolela selo sa go swana lehono, ge ba bona mosepelo wo mogolo wo wa Morena: go bušetša morago, go go phelega, balwetši le batlaišwa; go Mmona a šomiša Moya wa Gagwe ka Kerekeng ya Gagwe, go hlatha dikgopolo tša batho; go Mmona a dira feela bjalo ka ge A dirile ge A be a le mo lefaseng, go phethagatša se A rilego se be se tla direga. Nnete. Dikereke le batho ba, botšišitše se, “Ke Mang Yo?”

66 Ba be ba sa kwešiše gore Jesu o be a le mang, gobane ga go le yo motee wa bona a kgonnago go Mo lemoga, ka dikolo tša bona. “Ke seminari efe a tšwago go yona? Ke sekolo sefe sa thutamodimo A tšwago go sona?”

67 Gomme kafao go bjalo lehono. Bontšintši bja batho ba ba tloditšwego ka Moya wo Mokgethwa ba be ba sa tšwe seminareng. Ke ditšweletšwa tša kgetho ya Modimo mong. Eupša maswao le mehlolo, le dimaka tše di tshepišitšwego ka Beibeleng, di felegetša Moya wo Mokgethwa wo mogolo wo ge O sepela magareng ga batho.

68 Gomme ba re lehono, “Ba tšwa sekolong go sefe?” Feela ka pela ge o tsena toropokgolo, go swara tsošetšo, “Ke wena wa kereke efe ya leina?”

69 Ke bile le dinyakišišotsenelelo Labohlano morago ga sekgalela, le moprista wa Katoliki ya Roma go tšwa kerekeng ya Irish ka Louisville. Gomme go se fete gore ke tsebišwe go yena, monna wa serutegī yo mokaone, o rile, “Mna. Branham, o ne kereke efe ya leina?”

Ke rile, “Ga ke ne ye e itšego.”

Gomme o rile, gona, “A o ile wa hlomamišwa?”

Ke rile, “Ee, mohlomphegi.”

O rile, “O hlomamišitšwe ke mang?”

⁷⁰ Ke rile, “Morena Jesu o mphile Moya wo Mokgethwa, go rera Ebangedi, gomme o mphile thomo.” Gabotse, yeo ke tlhomamišo ye re e hlokago.

⁷¹ Jesu ga se a ke a tsoge a re go barutiwa ba Gagwe, “Eyang ntle go . . .” Ga ke swaswalatše dilo tšeo, eupša ba phetše letšatši la bona. Ga se a ke a re, “Eyang, le ithute go ba badiredi, lebaka la mengwaga ye *mentši*.”

⁷² O rile, “Lena letang ka toropongkgolo ya Jerusalema, go fihla ge le tladitšwe ka Maatla go tšwa Godimo.” O boletše seo go banna ba ba bego ba sa kgone go saena leina la bona beng. “Gomme ka morago ga se, Moya wo Mokgethwa o tlile godimo ga lena, gona le tla ba dihlatse tša Ka, mmogo ka Jerusalema, Judea, Samaria, le go fihla dikarolong tša kgolekgole tša lefase.” Yeo ke tlhomamišo.

⁷³ Ga re ne rekote ya Jesu a kile a ya sekolong se itšego, goba a aloga go tšwa seminareng ye e itšego. Go le bjalo, go bile diseminare tše ntši tše di agilwego Leineng la Gagwe, ka mabaka a bodumedi, go feta e ka ba eng gape—selo se sengwe gape se kilego sa ba lefaseng. Ga se re ke ra tsoge ra ba le ge e ka ba ye e itšego—rekote ye e itšego ya Gagwe a kile a ya sekolong. Eupša, go le bjalo, go bile dikolo tše ntši di agilwego Leineng la Gagwe go feta kafao go lego go e ka ba mohuta ofe wa leina o lego ka tlase ga magodimo, dikolo. Ga se ra ke ra tsoge ra tseba ka Yena a ngwala puku. Go le bjalo, go bile dipuku tša go fetiša di ngwadilwego ka Yena go feta dingwalwa tšohle di ngwadilwego. Gomme, lehono, Beibele ya Gagwe ke Puku ya go tsebalega kudukudu ye e lego gona lefaseng lohle, magareng ga dingwalwa tšohle.

⁷⁴ Eupša, le a bona, ka letšatšing la ketelo, ba goeditšwe, “Ke Mang Yena?”

⁷⁵ Le a bona, Modimo o tšea se sengwe se se bonalago o ka re ga se selo, go dira se sengwe go tšwa go sona. Seo ke se se Mo dirago Modimo.

⁷⁶ Gomme ge ba Mmone a etla, a katiša go tsena ka kgoro, ba bangwe ba bona ba rile, “Yena ke Monna yo mogolo.”

⁷⁷ Ba bolela seo lehono. Go na le dikolo tša thutamodimo tše di rutago, lehono, gore Jesu e be e le Monna yo mogolo, gore O be a le Monna wa go loka. Tše dingwe tša tšona ebile di re O be a le moprofeta. Bjale, ge A be a le moprofeta feela, goba Monna wa go loka, re ka dibeng tša rena. O be a feta moprofeta. O be a feta Monna wa go loka. Go le bjalo, O be a le Monna wa go loka. Go le bjalo, O be a le Modimo Moprofeta. Eupša O be a feta fao. O be a le Modimo a bonagaditšwe nameng, go tšea go tloša sebe.

⁷⁸ Gomme ge A etla, a katišetša ka gare, batho ba bantši ba rile, “Yena ke mofodiši. Oo, re Mmone a bula mahlo a difofu. Re

Mmone a dira monna wa segole go sepela. Re Mmone a neela thapelo, gomme phišokgolo e tlogela ngwana.” Eupša, nako yeo, mohuta woo ba be ba no Mo latela bakeng sa dilofo le dihlapu.

⁷⁹ Gomme ke ka tsela yeo mašaba a lego lehono, bontši. Ge go na le mofodiši, gobaneng, ba—ba a Mo latela, gomme O no ba—O no ba sediba sa leganateng. Ge ba babja, ba a kitima, ba re, “Oo, ka kgopelo a o ka nthapelela, gore Morena Jesu o tla ntira ke loke?” Gomme ka pela ge ba ešwa ka sepetlele, goba mpeteng wa balwetši, thwi morago lefaseng ba a ya, bjalo ka mpša go mahlatša a yona, goba kolobe go leraga la yona, bjalo ka ge Lengwalo le boletše. Ba no Mo latela bakeng sa se sebotse ba ka kgonago go se hwetša go tšwa go Yena. Ba Mo šomiša feela bakeng sa—sa kota ya moeno, goba—goba se sengwe seo—seo ba ka se hwetšago go tšwa go Yena, gomme ga ba letele go Mo direla. Lešaba leo le sa ya pele lehono.

⁸⁰ Go bile balephera ba senyane ba go fodišwa, gomme yo motee o ile a bowa go Mo fa tumišo. Goba a e be e le lesome? Bona, yo motee wa bona, o ile a bowa go Mo fa tumišo, gomme bohle ba bona ba ile pele, ba hloka tebogo.

⁸¹ Gomme ge batho ka Amerika, ba ba fodišitšwego ke Maatla a Modimo, ba ka bušetša dipelo tša bona go Modimo, go tla ba tsošeletšo ye e ka rathago setšhaba ye e tla tswalelago sekoti se sengwe le se sengwe sa botagwa, yeo e tla . . . Mabenkele a go phuthela le mabenkele a wisiki a tla ba ka ntle ga seswantšho. Dikereke di ka tlala. Mafelo a dipaesekopo a ka se be le selo ka Lamorena bošego. Gomme go tla ba le tsošeletšo ye e phulegago ntle, go kgabola setšhaba se. Eupša ge ba e bona e direga, dilo tše Modimo a di dirago, ba sa goeletša, “Ke Mang Yena? Ke Mang yo a tlogo? Ba tšwa kae? Ke Mang yo? Se se dirwa ka maatlataolo a mang?”

⁸² Nka se tsoge ka lebala, ka Johannesburg, Afrika Borwa. Ke be ke sa tšwa go fihla, e ka ba metsotso ye masometharo pele, mo sefofaneng. Ke be ke bile matšatši a mararo le mašego moyeng, ke be ke lapile kudu ke sa kgone le go kgotlelela. Ba—ba ntšetše ntle go ya mabaleng a dipontšho moo batho ba dikete tše masometlhano goba masometshela ba bego ba kgobokane. Gomme e sego ka pela go feta ge ke fihla godimo ga sefala, go fihla ge Moya wo Mokgethwa . . . Ke bone, go tla go kgabaganya lefelo, pe—pe pese. Gomme e be e na le leswao godimo ga yona, “Durban.” Ke bone lesogana le swanela go thathankgana le go ngwega go tloga go tatago lona le mme, ka leoto le tee tše tshela goba diintši tše seswai boripana go feta le lengwe. O be apere hempe ye tšhweu, ka makhrisipane a swere borokgo bja gagwe godimo. Gomme ke eše lesogana šedi. Ke ile ka lebelela morago gape. Pono e be e tlogile. Gomme nako yeo, feela mo nakwaneng, ke bone Seetša sela se lekeletše bokagodimo ga lesogana, tsela morago ka go batheetšiši. Gomme ke ile ka lebelela. Ka gopola, “Ke mmone felotsoko.” Ke ile ka mo šetša, gomme Seetša sela

se ile sa tšwelapele se swere bokagodimo ga gagwe lebaka la metsotso e se mekae. Gomme ke be ke letetše mofetoleli go swara mantšu a a latelago. Morago ke bone lesogana lona le le swanago le emela godimo, le lahlela mahlotlo a lona fase, gomme leoto le lekopana la diintši tše tshela le etla fase go lekanela le ohle.

⁸³ Gomme ke rile go Mna. A. J. Schoeman; yo a lego ka Letagong, bošegong bjo. Ke rile, “Mna. Schoeman, ke no tsopola mantšu a ka. Ke pono.”

O rile, “Go lokile kudu.”

⁸⁴ Gomme ke rile, “Lesogana le le dutšego morago kua le aperego hemepe ye tšhweu, le makhirisipane, o tšwa go toropokgolo ye e bitšwago Durban, dimaele tše makgolo a lesometlhano go kgabaganya naga, ka peseng. Gomme o ngwegile go tloga go tatagwe le mmagwe, go tla. Eupša o dumetše go Morena Jesu, gomme o na le leoto le letee la diintši tše tshela bokopana go feta le lengwe.”

⁸⁵ Gomme lesogana la tabogela godimo. O be le fale, a eme, a leka go phophola mahlotlo a gagwe. Gomme ke rile, “Lesogana, Morena Jesu o go fodišitše.” Gomme ka bjako leoto la gagwe la tla ntle diintši tše tshela, go itekanela, le a mangwe ohle. Gomme ba ile ba tliša lesogana sefaleng, gomme ngaka ya mo hlahlofa fao. Le bona senepe sa gagwe ka pukung ya ka.

⁸⁶ Ke be ke eme fao dinakwana di se kae feela, ke bone ye nnyane, koloi ye tala e kitima go theoga tsela, gomme e ile ya thelela. E ile ya retologa go dikologa, go leba morago, gomme ya gehlenya mohlare. Yo moswa, mosetsana wa hlogokhulwana o be . . . o bile le mokokotlo wa go robega. Gomme ke rile, “Ke bone ye nnyane, koloi ye tala ye e thelletšego ka mohlareng, gomme mosetsana yo moswa wa hlogokhulwana wa mengwaga ye e ka bago lesomeseswai bogolo o na le mokokotlo wa go robega. O ka seemong sa go hlobaetša.” Ga go le o tee a go arabela. Gomme ke be ke sa kgone go mmona le ge e ka ba kae kapa kae ka go ba bantši, batheeletši ba bagolo ba batho. Gomme ke ile ka eme fao feela metsotso e se mekae. Ke rile, “Kwešišang. Ke . . . Le se ke la gononwa. Ke Morena Jesu, ka Maatleng a tsogo. O rometše Moya wo Mokgethwa go tšwetšapele mošomo wa Gagwe.” Gomme ke bone pono e direga godimo gape. Gomme ke be ke sa kgone go bona mosetsana yo moswa.

⁸⁷ Feela nako yeo, go eme thwi pele ga ka, mo go be go eme Seetša sela, bjalo ka ge le bona senepeng. Gomme Se be se eme mo. Ke sepeletše godimo kua, gomme o be a robetše fale, fase tlase ga sefala. Ke ile ka re, “Mohumagadi yo moswa, Morena Jesu o go dirile o be gabotse.” Gomme a thoma go lla.

⁸⁸ Mmagwe o rile, “Oo, aowa! O se ke wa mo rera gore a tsogele godimo!” A re, “Ge a šišinyega, o tla hwa.”

⁸⁹ Gomme mohumagadi yo moswa a taboga go maoto a gagwe, a goeletša, le go tumiša Modimo. Gomme mmagwe a idibala

gomme a wela ka go mpetiana wo mosetsana a bego a robetše ka go wona.

Ke eng?

⁹⁰ Feela e ka ba ka yona nako yeo, monna wa go swaswalatša a phagamela godimo morago kua, gomme a ema ka leoto le tee godimo ga setulo se tee, gomme le lengwe godimo ga le lengwe, gomme a re, “Wena, Moamerika! Ke a go hlohla o mpotše ka Leina lefe o dirago se ka go lona! Gomme ke kereke efe ya leina o lego wa yona?” Le a bona?

⁹¹ Go no swana. Ga ba kwešiše. Ga ba lebelele dilo tše. Dikereke ga se tša lebelela go Tla ga Morena. Gomme Moya wo Mokgethwa o fa go tlišetša go Tla ga Gagwe, go Go dira go phethega. Kudu bjalo, ye nngwe le ye nngwe e nyaka go tšea tsela ya yona mong.

Ke tsela ye e bilego ka yona kua. Sehlopha se sengwe le se sengwe se bile le mmono wa bona beng.

⁹² Eupša yeo ga se potšišo bošegong bjo. Ga se se ke bolelago ka sona. Eupša potšišo ye ke le botšišago yona, ke, le nagana gore ke Eng? E a le ama. Ke Mang Yo a yago godimo le fase ditšhabeng? E sego banna. Banna ga ba kgone go dira dilo tšeo. Ke Mang a bolelago le go re go batho ka go batheeletši, bjalo ka ge, “Ba dutše thwi *mo*, godimo *mo*,” le mafelo a go fapana ka kopanong, ge banna le basadi ba tlišwa ka mo, ba ehwa? Ke Eng?

⁹³ Mosadi yo moswa yola a sepeletšego ka bokolobetšong mosong wo, yo dibeke tše tharo tša go feta, a bego a ehwa ka kankere ya letlalo, o dula thwi mo ka Maple Street, Mdi. Baity. Gomme ke botšišitše dingaka tše tharo di bego di na le yena. O be a se na le sebaka setee go phela, ka bana ba bannyane ba bane goba ba bahlano, gomme mme wa ka a leka go ba hlokomela. Mme o rile, “Bill, a ka se tsoge a tla gae gape.”

⁹⁴ Gomme ke ile ntle mo a bego a le gona, gomme Morena Jesu a bolela, “GO RIALO MORENA, ge a ka ya kerekeng gomme a tshepiša go kolobetšwa ka go Leina la Morena Jesu, gomme o tla direla Modimo, o tla ya gae, a fodile.”

Gomme ke ile ka mmotšiša, “A o tla dira se, mohumagadi?”

⁹⁵ Gomme o rile, “Tšohle tše o di bolelago, ke tla se dira.” Ka bjako mahlabi a sepela. Matšatši a mararo moragorago, o be a le gae, gomme dingaka ga di kgone go hwetša mohlala o motee wa kankere yeo.

⁹⁶ Ke mang Yo a tlogo Leineng la Morena? Ke Eng? Ke Moya wo Mokgethwa wa Modimo. Kgopolo ya gago ke eng ka Wona? Kgopolo ya gago ke eng, go tseba modiša wa gago? Gomme ge le dutše ka go ditulo tše mo, batho ba ba tšwago ka ntle ga toropo, ba dutše le bolwetši bja go hwa dihwahwa, ba dutše le . . . Mo go dutše monna, felotsoko ka mo, ngwanešu wa Mennonite, thwi mo, motlaišegi wa bolwetši bja go hwa dihwahwa. Ga se ka ke ka tseba goba go mmona, selo ka yena. Gomme gatee ka pela, e ka ba

mengwaga ye mebedi ya go feta, ke a thanka, goba se sengwe. Ya. Mengwaga ye mebedi. Moya wo Mokgethwa o bo biditše, gomme o rile “GO RIALO MORENA.” Ga se a ke a tsoge a ba le tlaselo ge e sa le. Ke Eng? Ke Eng?

⁹⁷ Mosadi yo o be a dutše mo, Lamorena la go feta, nako ya mafelelo ge ke be ke le mo, o tlile tlase go tšwa felotsoko ka Illinois. Letšatši le le latelago, ka sekutu se segolo ka mmeleng wa gagwe, se se bego se pherile. Gomme ba bangwe ba saentshe ya dihlaré ba bakaonekaone ba Illinois ba be ba mo tšea go ya kliniking ye kgolo, go dirwa karo, Mošupologo. Gomme o ile a pitlaganyetša tšela ya gagwe ka gare. Ga se ka ke ka mmona goba go kwa ka gagwe, ka bophelong bja ka bjohle. Gomme gohle ka pela, Moya wo Mokgethwa o ile wa mo pipa ka morithi, gomme O mmoditše gore o be a le mang, moo a tšwago, gomme o be a eya go dirwa karo letšatši le le latelago. Ke ba bakae ba bego ba le mo nako yeo, go bona seo? [Phuthego e re, “Amene.”—Mor.] Gomme bonang ditaba di elela morago. Letšatši le le latelago, ge a ile go ngaka, ba mo tšere go tloga go kliniki go ya go kliniki, gomme ga se ba kgona go hwetša mohlala wa sona.

⁹⁸ Ke Mang Yo? Oo, Modimo e ba le kgaogelo! Ke Mang Yo a dirago se? A o ka kgona go bolela gore e be e le modiša wa gago? Le gatee. A o ka bolela gore banna ba bile le ge e ka ba eng go dira ka go yona? Le gatee. Ke Moya wo Mokgethwa, Moya wo o bego o le godimo ga Morena wa rena Jesu. Gomme go Tla ga Gagwe go ikopanya Yenamong le Kereke ya Gagwe, go kgauswi kudu mo A phatlalatšago pele Seetša sa Gagwe se segolo se se kgethwa, go lopolla, le go tliša ka go kopanelo, Kereke ya Modimo wa go phela, bakeng sa Tlhatlogo ye e lego kgauswi mo go batameleng. Amene!

⁹⁹ Ke Eng? Nka se kgone go araba potšišo ya gago. Nka se kgone go go arabela. Eupša nka kgona go ikarabela nnamong. Gomme godimo ga teseke ye kgethwa ye, bošegong bjo, ka ditsebeng tša ye, khamphane, le ba—ba barekwa ka Madi a Morena wa rena Jesu, ke bolela se go tšwa botebong bja pelo ya ka. E sego ka gore ke nna yo mongwe wa lena, e sego ka gore ke no ba yo mongwe wa go fapana, eupša yo mongwe wa balopollwa yo a hlatswitšwego ka Madi. Ke a dumela gore Seetša sela se se swanago se se lekeletšego ka kerekeng ye, bošegong bjo, se Setee sa go swana se a laetša, ka tlhago ya Sona, gore Ke Jesu Kriste, ka sebopego sa Moya wo Mokgethwa.

¹⁰⁰ Yo mongwe le yo mongwe a tsebago Lengwalo, o a tseba gore Jesu o rile, “Ke tšwa go Modimo, gomme Ke ya go Modimo.” Pele A be a ka dirwa nama, ge a be a na le Moshe ka lešokeng, O be a le Pilara ya Mollo. Gomme ge Moshe a dumile go Mmona, O fetišitše dikarolo tša magetla a Gagwe go yena. Gomme Moshe o rile, “Go lebega bjalo ka Motho.” Ge A be a le mo lefaseng, O be a le Motho. O dirile tšona dilo tša go swana tše A di dirago, lehono, ka banna ba A ba lolopotšego. Fale O tlile gomme a ba

le senepe sa Gagwe sa tšewa. Ke Eng? Morago ga lehu la Gagwe, poloko le tsogo.

¹⁰¹ Paulo o be a le tseleng ya gagwe go ya Damaseko, letšatši le lengwe, gomme Seetša se segolo sa mo rathela fase. Banna bao go mo dikologa ga se ba bona Seetša. Eupša Se rathetše Paulo fase, go fihla Se mo dira sefofu. O bile le bothata ka mahlo a gagwe bophelo bjohle bja gagwe. Gomme o boletše nako ye nngwe, “Gore ke se phagamišwe ka godimo ga botlalo bja kutollo, ke filwe,” mootlwa ka nameng ya gagwe, motseta wa Sathane, go mo keketa. Ka gore e be e le kutollo ya go phophoma.

¹⁰² Gomme ge Paulo a rathetšwe fase, tseleng ya gagwe go tlaiša batho ba ba bego ba dira lešata le lentši; sehlopha sa go tswalwa gape, batho ba ba bego ba bitšwa mahlanya. Paulo o be a le tseleng ya gagwe go tlaiša bao, ka dipampiri ka potleng ya gagwe, go ba swara le go ba tliša Jerusalema. Gomme e ka ba gare ga mosegare, fao go tlile Seetša fase, se sa go mo ratha go tloga go maoto a gagwe, go ya mobung, gomme a wela ka go lerole la lefase. Fao go tlile Lentšu go tšwa Seetšeng seo, la re, “Saulo, Saulo, o Ntlhorišetša eng?”

¹⁰³ Gomme Saulo a pshikologa, ka go seemo sa gagwe sa bofofu, a lebelela godimo. Gomme o be a kgona go bona se segolo sela, sa letago Seetša. Gomme o rile, “Morena, Wena o Mang?”

¹⁰⁴ O rile, “Ke nna Jesu. Ke tšwele go Modimo; Ke ile go Modimo. Ke tšwa go Modimo; Ke boela go Modimo.” O rile, “Go bothata go wena go raga kgahlanong le diotledi.”

¹⁰⁵ Kutollo e tee godimo ga lešabašaba le lekgethwa lela, nako e tee godimo ga lefelo lela, motho a ka se tsoge a swana. Motho, pele a ka ipitša ka boyena Mokriste, pele a ka itsebagatša yenamong, o swanetše go ba le boitemogelo bjola bja lehlakore la morago la leganata, mo a kopanego le Modimo, sefahlego ka sefahlego.

¹⁰⁶ Ka gore, lehono, o ka kgona go ba le mohuta e ka ba ofe wa karabo. O ka kgona go bona Morena a dira feela tšwa se A rilego dira, gomme ditswerere tša baithutamodimo ba tla Le hlathollela go šele. Ba tla re, “E bile la letšatši le lengwe. E be e le la *le*. Goba, Ke la lebaka le lengwe. Goba, Le fošagetše.” Go swana le ge ba boletše ka Jesu, “Yena ke Beletsebubu, diabololo. Yena ke mmolellamahlatshe.” Le dilo tšeo tšohle, ba na le karabo.

¹⁰⁷ Eupša ge motho a kile a tla ka kgokaganong le Kriste, gomme a Mmona bjalo ka ge Paulo a dirile, goba a itemogetše Yena, ga go baithutamodimo ba go lekanela lefaseng ba ka tsogego ba kgona go hlatholla boitemogelo go tloga go motho.

¹⁰⁸ Leo ke lebaka, lehono, ga ba na le boitemogelo. Leo ke lebaka le ba ka se kgonego go bolela . . . bohle ba re, “Ke Mang Yo? Ke Eng Se? Se tšwa kae?” Ga ba na le karabo. Gobaneng? Ka gore, sohle ba se tsebago ke thutamodimo yeo kereke ye nngwe e e

dirilego. E sego “go tseba thutamodimo” ke Bophelo. E sego “go tseba Beibele” ke Bophelo.

¹⁰⁹ Eupša “go tseba Yena” ke Bophelo. “Go tseba Yena” bjalo ka Mophološi wa gago wa sebele, bjalo ka yo Motee Yo a go tladitšego ka Bogona bja Gagwe. O be o le fao ge e direga. Ga go yo motee a ka Bo tšeago go tloga go wena. Ga go yo motee a ka Bo hlathollago go tloga go wena. Ge boitemogelo bjola bo direga go wena, o tseba gore Yena ke Mang. Go nna, Yena ke Jesu Kriste wa go swana maabane, le hono, le go ya go ile.

¹¹⁰ Ke mang yo a dirago mehlolo ye? Ke eng se se dirago mediro ye megolo ye? A ke moreri? A ke Oral Roberts? A ke Billy Graham? A ke Jack Schuler? William Branham? Mang kapa mang e ka bago yena, ga ba ne selo go dira le yona. Ke bona didirišwa.

¹¹¹ Ke Moya wo Mokgethwa o tlogo pele ka Ebangedi, ka maswao le dimaka le mehlolo, go dira batho go lokela. Moya o tladitšwe ka ditetelo, ka badumedi ba Mo letile go tla.

¹¹² Gomme ba bangwe ba re, “Gobaneng ditsošetšo tše? Gobaneng re na le yona? A re duleng fase go kereke.” Gobaneng, go boletšwe ka kerekeng thwi mo, gore, ge re thomile go aga kereke ye mpsha, ba rile, “Ga re hloke mehlolo. Ga re sa hloka dilo tše gape. Le a di nyaka, eyang pele ntle ka lebaleng mo di diregago. Ga re di hloke mo.” Ge Branham Taberenekele e kobegela go lefelo lela la fase, e nweletše.

¹¹³ Kereke ye e theilwe godimo ga dikokwane le Maatla le Ebangedi ya Jesu Kriste. Gomme ge feela taberenekele ye e eme, a nke Moya wo Mokgethwa wa letago o hwetše go fihlelela disoulo, go phološa, le go tlatša ka Moya wo Mokgethwa, le go fodiša balwetši. Go nna, ke Jesu Kriste wa go swana maabane, le hono, le go ya go ile.

A re rapeleleng.

¹¹⁴ Ge o sa tsebe gore Yena ke Mang, ga o tsebe gore se sohle ke ka eng, gomme o nyaka go tseba, a o ka no dira bontši bjalo ka go phagamiša seatla sa gago? Gomme o re, ka go phagamiša seatla sa gago, “Nthapelele, Ngwanešu Branham, gore ke Mo tsebe.” Gomme Morena a go šegofatše. Gomme gohle go dikologa, ke bona diatla tša lena.

¹¹⁵ Bjale, Tate wa Magodimong, re tliša Molaetša wo, le dikenywa tša batho ba ba phagamišitšego diatla tša bona, gore ba rate go tseba gore Yo ke Mang. Ba nyaka go tsebana le Jesu yo mogolo yo. Gore, go Tla ga Gagwe, ga tsogo, go kgauswi kudu, go fihla balwetši ba thoma go fodišwa. Gomme morago ge seo se diregile, gona seprofeto se tlile ka Kerekeng, gona dimpho le mehlolo, bjale go theoga go fihla go leswao lela la mafelelo. Sa go latela se tla tla, Tlhatlogo, Kereke e tla tšeelwa go tloga. Gomme rena, Morena, ba re nago le tleleime go Go tseba ka go Maatla a

tsogo ya Gago, re letetše, le go hlologela, le go lla, le go kgopela, “Etna, Morena Jesu!”

116 Hlatloša Kereke ya Gago le go E tloša, ka pela, Morena. Ka gore, ka pela, banna ba ya go thuthupiša lefase le O le holetšego bona go dula go lona, gobane ga se ba Go obamela. Ga se ba ithuta khutšo, eupša ntwa. Ga se ba ithuta toko, eupša ba ithutile go seleka. Kafao ba ka se kego ba swarelwa maatla ke tlala bohle! Morena, lefelo le lennyane lela ka pelong ya bona le le ba dirago go swarelwa maatla ke tlala, ba leka go e kgotsafatša ka laboratoring felotsoko, go thuthupišetša monna wa gabo bona godimo.

117 Modimo, ge ba ka kgona feela go lemoga gore maatla ao ba a hloletšego ke Maatla a tsogo ya Morwa wa Modimo, Maatla a Moya wo Mokgethwa go fetola maphelo a bona; e sego go thuthupiša ditšhaba, eupša go fetola maphelo a bona le go ba dira bahlanka ba Gago.

118 Batho ba bantši, ba rathilwe ke bogafa bja bobelete, ba re tseba bjalo ka sehlopha sa “go se tsebe selo,” le—le bjalo ka “mahlanya,” bjalo ka ge ba dirile ka matšatšing a pelepele. Eupša ge ba boile, ba thabile, ba Go leboga gore ba kgona go rwala kgobogo ya Leina la Gago. Ao ke maikutlo a bana ba Gago, bošegong bjo, Morena, kae kapa kae. Re thabile feela.

119 Ba bangwe ka letšatšing la Gago ba lekile go Go tsebagatša. Ba rile, “Yena ke mogwera wa monna yola wa lebelete, Johane, yo a tlilego go tšwa lešokeng a sa apara le ge e le diaparo, feela mokgopha wa nku wa kgale o tatilwe go mo dikologa. Monna wa lebelete a bego a fošetša mantšu, bohlabela le bodikela, gomme a re, ‘Selepe se beilwe modung wa mohlare.’” Ba rile, “Yena ke mo—mo molatedi wa gagwe. Yena ke monna wa lebelete. Yena o a gafa. Yena o tšwele monaganong wa Gagwe.” Bodiredi bja ka godimo ga tlhago bjo bo bego bo na le Wena, O Morena, bo fofaditše mahlo a bao.

120 Gomme kafao O bjalo gape lehono. Moya wo Mokgethwa wo mogolo wo o etellapele go Tla ga Morena, bjalo ka ge Johane a dirile ka go letšatši la gagwe, a fofaditše batho, go bao ba sa nyakego go bona. Eupša go bao ba ratago go bona, Wena o ba kgethile. “Gomme bohle ba Tate a Mphilego bona ba tla tla go Nna,” O rile, “gomme ga go le o tee wa bona a tla lahlelago. Gomme Ke tla mo tsošetša godimo ka letšatši la mafelelo.” Re leboga Wena ka se.

121 Gomme bao ba phagamišitšego diatla tša bona, bošegong bjo, re a rapela, O Morena Modimo, gore O tla dira Wenamong go tsebja go bona, ka maitemogelo, ka Maatla a tsogo. E fe, Morena.

122 Gomme ba bangwe ba ka be ba le mo, ba ba sego ba phagamiša seatla sa bona, eupša go le bjalo, ka pelong ya bona, ba tsebile gore ba e hloka. Ke a rapela gore O tla ba šegofatša, le go ba fa tlhologelo ya pelo ya bona.

123 Ge re tlogela moago, bošegong bjo, a nke re tloge bjalo ka batho ba go fapana. A nke re tloge ka morero wa go fapana go feta wo re bilego nao, go tleng ka gare, ge o be o fapana le thato Kgethwa ya Gago. A nke re ye ntle ka maikemišetšo go swara dinaka tša aletara, go fihla soulo ya rena e kgotsofetše gore re bile le boitemogelo le Wena, gomme re tseba Yo re mmolelago, gobane re kopane le Yena le go Mo tseba, le go ba le kopanelo le Yena. Efa dilo tše, Tate. Fodiša balwetši le batlaišwa.

124 Šegofatša modiša wa rena wa go ratega le yo bohlokwa. Modimo, re a rapela gore O tla ba le yena le dikgaetšedi tša gagwe tša go ratega, ge ba opela Ebangedi, le go E rera ka go seyalemoya sa bona.

125 Šegofatša basetsebje ba ba lego ka dikgorong tša rena. Morena, a nke ba ye ka ntle, bošegong bjo, ka go tšhatšha ka pelong tša bona, le morero gore bona, go tloga go iri ye go ya pele, ge ba sa go tsebe le gore ga se ba ke ba Go direla, pele, a nke ba Go direle. Ka go tseba se, gore, “Dilo tše dingwe tšohle di tla tla go lefeela, eupša Lentšu la Morena le tla dula go ya go ile.” E fe, Tate.

126 Re lebalele, dibe tšohle tša rena. Gomme a nke re kopane ka go le legolo lela. . . [Ga go selo godimo ga theipi—Mor.]

Gobane O nthatile pele
Le go reka phološo ya ka
Godimo ga mohlare wa Khalibari.

127 Bjale, ka morago ga Molaetša, a re nong go inamiša dihlogo tša rena gomme re Mo rapele, ge re Mo opelela.

Ke a Mo rata, (ka pelo yohle ya gago) ke a Mo
rata
Gobane O nthatile pele
Le go reka phološo ya ka
Godimo ga mohlare wa Khalibari.

128 Ke ba bakae ka kgonthe ba Mo ratago? Phagamiša seatla sa gago, bolela se ka bohlatse, “Ke a Mo rata.” Oo, a Yena ga a makatše? [Phuthego e re, “Amene.”—Mor.] Le a tseba, ke no rata go dula ka mokgwa wo le go no nwa ka gare, ka mokgwa wo mongwe, Bogona bja Gagwe. Lentšu la Gagwe, le ile pele, Le wetše ka dipelong. Le a re phošolla. Le re tliša go ineeleng go Moya wa Gagwe. Ke mo Go ratega bjang go no Mo rapela gona! Bjale, ge le eya go tloga kerekeng, bošegong bjo, yang, le Mo rapela.

129 Gomme elelwang, beke ye, go na le kopano ya thapelo mo ka Laboraro bošego. Le se ke la lebala kgašo ya Ngwanešu Neville ka Lamorena, goba ka Mokibelo, ka iri ya senyane, godimo go WLRP. Ke no rata go ba kwa, a ga le? Baopelanne, goba baopelatharo, ba kwala gabotse. Mosadi le nna, le digotlane, bohle re na le seyalemoya se sennyane ntle gomme—gomme re tlhetlha go dikologa le sona, go theetša Ngwanešu Neville le

kgašo ya gagwe, le mantšu a gagwe a go makatša, a ka fao a phagamišago Modimo yo a mo ratago le go mo dumela. Ga ke bolele se go . . .

¹³⁰ Lena basetsebje mo, ge o se na le kereke legae, etla o re tšoene. Ke a go botša, ga ke bolele se yena a dutše mo. Aowa, mohlomphegi. Ke boletše se, makga a mantši. Ke rata Ngwanešu Neville. Se, pele, ke moithutamodimo. Selo sa pele, ke ngwana wa Modimo. Selo sa go latela, o a swana letšatši le lengwe le le lengwe. Ke mo tsebile lebaka la mengwaga. Ga se a tsoge a fetoga, le nthathana e tee. O sa no ba Orman Neville, mohlanka wa Morena Jesu. Gomme ke nagana o na le . . .

¹³¹ Bošego bjo bongwe, ke biditye godimo, go mmotšiša ge eba ga se nke, ka go lenaneo la gagwe, a be a ka kgona go re direla sebaka go tla tlase le go rapelela balwetši. Go bile ba bangwe ba tlile ka gare, e bile mosong wo, le a tseba. Gomme mosadi wa gagwe yo monnyane o arabile mogala, gomme ke be ke bolele le mosadi wa ka, morago kua, ka yona.

¹³² Gomme re leboga Modimo bjang bakeng sa mosadi wa gagwe yo monnyane wa go ratega le lapa la gagwe. Ke mo go kaone kudu. Ge o bona modiredi le mosadi wa gagwe ba kwana mmogo ka mokgwa woo, ka bobose le go kokobela, seo se no dira kereke go ya bokaonekaone bjo bokaalo. E no ba bosebose ge matšatši a eya go feta.

¹³³ A le Mo rata ka pelo ya lena yohle? [Phuthego e re, “Amene.”—Mor.] Go lokile. Re na le koša ya go phatlalala ye re e opelago, *Tšea Leina La Jesu Le Wena*. Gomme re fe tšhune ye nnyane, kgaetšedi, ge o na le yona ka fao pukung. Gomme re ya go opela kopelo ya rena ya go phatlalala. Gomme ge re opela temana ya pele, re rata go retologa go dikologa, šišinyanang diatla seng sa lena. Go lokile. Re fe tšhune.

. . . Leina la Jesu le wena,
Ngwana manyami le madimabe;
Le tla go fa thabo le khomotšo,
Le tšee gohle mo o yago.
Leina le bohlokwa, O bose bjang!
Kholofelo ya lefase le thabo ya Legodimo;

Modimo a go šegofatše, ngwanešu.

Leina le bohlokwa, O bose bjang!
Kholofelo ya lefase le thabo ya Legodimo.

A re tšeeng temana ye bjale.

Leineng la Jesu go a inangwa,
Go wa go ikala maotong a Gagwe,
Kgoši ya dikgoši Legodimong re tla Mo rweša
korone,
Ge leeto la rena le fedile.

A go ka se makatše?

Le bohlokwa, Leina le bohlokwa, O bose bjang!
 Kholofelo ya lefase le thabo ya Legodimo;
 Leina le bohlokwa, (Leina le bohlokwa) O bose
 bjang!
 Kholofelo ya lefase le thabo ya . . .

¹³⁴ Ke ba bakae ba elelwago koša ya rena ye nnyane re bego re tlwaetše go e opela, *O Se Lebale Thapelo Ya Lapa?* Le a e elelwa? Ga ke . . . Thelma, ge e ba o tseba yeo, goba tšhune, goba aowa? A re e lekeng gatee. A ga le e elelwe? A re . . . Mohlomongwe nka e leka gatee le lena.

O se lebale thapelo ya lapa,
 Jesu o nyaka go kopana le wena fao;
 O tla tšea pelaelo ye nngwe le ye nngwe ya
 gago,
 Oo, se lebale thapelo ya lapa.


¹³⁵ Ke ba bakae ba nago le thapelo ya lapa? Ke mo gobotse. A re e lekeng gape. Ke tla hwetša yeo morago ka mo. Ke rata yeo. Bohle mmogo bjale.

O se ke—o se lebale thapelo ya lapa,
 Jesu o nyaka go kopana le wena fao;
 O tla tšea pelaelo ye nngwe le ye nngwe ya
 gago,
 Oo, o se lebale thapelo ya lapa.

¹³⁶ O Morena, go ngwadilwe ka Mangwalong, gore ba tšere go tšwa mmeleng wa Paulo disakatuku goba dithethwana, gomme memoya ya go se hlweke e ile ya tloga go tšwa go batho, gomme malwetši a fodišwa. Re a rapela, O Morena, gore mokgwa wa go swana, o tla laetšwa godimo ga tše, bošegong bjo, ge ke di romela go bahloki le balwetši. Ntle felotsoko ka dinageng, go na le yo mongwe o letetše le go leta se go direga. Ke a rapela, Tate, gore O tla e fa Leineng la Jesu, Morwa wa Gago. Amene.

¹³⁷ Bjale ke ya go kgopela, ge re inamiša dihlogo tša rena, ge Ngwanešu Smith wa rena yo bohlokwahlokwa godimo mola, go tšwa go kereke ya Modimo, yo re mo hweditšego, go no swana le Ngwanešu Neville mo, go ba wa potego, go botega, mohlanka wa Modimo. Ke ya go mo kgopela go kgopela ditshegofatšo godimo ga lena, go tšwelapele go kgabola beke ye e tlogo. Modimo a le šegofatše, go fihla re kopana le lena gape.

¹³⁸ Ngwanešu Smith. [Ngwanešu Smith o a rapela—Mor.] Ee, Morena. Ee. Ee. Ee. Ee. Amene.

¹³⁹ Šišinyang diatla yo mongwe tša yo mongwe. Le amogetšwe morago gape, go taberenekele. Modimo a le šegofatše. 

KE MANG YO? NST59-0510E
(Who Is This?)

Molaetša wo ka Ngwanešu William Marrion Branham, setlogong o abilwe ka Seisimane ka Letšatši la Mme, Lamorena mantšiboa, Mei 10, 1959, mo Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice of God Recordings.

NORTH SOTHO

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org